

全唐诗卷三十四

卷 34_1

【陇头水】杨师道

陇头秋月明，陇水带关城。
笳添离别曲，风送断肠声。
映雪峰犹暗，乘冰马屡惊。
雾中寒雁至，沙上转蓬轻。
天山传羽檄，汉地急征兵。
阵开都护道，剑聚伏波营。
于兹觉无渡，方共濯胡缨。

卷 34_2

【中书寓直咏雨简褚起居上官学士】杨师道

云暗苍龙阙，沉沉殊未开。
窗临凤凰沼，飒飒雨声来。
电影入飞阁，风威凌吹台。
长檐响奔溜，清簟肃浮埃。
早荷叶稍没，新篁枝半摧。
兹晨怅多绪，怀友自难裁。
况复重城内，日暮独裴回。
玉阶良史笔，金马谏天才。
高薨通散骑，复道驾蓬莱。
思君赠桃李，于此冀琼瑰。



卷 34_3

【阙题】杨师道

汉家伊洛九重城，御路浮桥万里平。
桂户雕梁连绮翼，虹梁绣柱映丹楹。
朝光欲动千门曙，丽日初照百花明。
燕赵蛾眉旧倾国，楚宫腰细本传名。
二月桑津期结伴，三春淇水逐关情。
兰丛有意飞双蝶，柳叶无趣隐啼莺。
扇里细妆将夜并，风前独舞共花荣。
两鬟百万谁论价，一笑千金判是轻。
不为披图来侍寝，非因主第奉身迎。
羊车讵畏青门闭，兔月今宵照后庭。

卷 34_4

【初秋夜坐应诏】杨师道

玉琯凉初应，金壶夜渐阑。
沧池流稍洁，仙掌露方溥。
雁声风处断，树影月中寒。

爽气长空净，高吟觉思宽。

卷 34_5

【赋终南山用风字韵应诏】杨师道

眷言怀隐逸，辍驾践幽丛。
白云飞夏雨，碧岭横春虹。
草绿长杨路，花疏五柞宫。
登临日将晚，兰桂起香风。

卷 34_6

【咏饮马应诏】杨师道

清晨控龙马，弄影出花林。
躩蹠依春涧，联翩度碧浔。
苔流染丝络，水洁写雕簪。
一御瑶池驾，讵忆长城阴。

卷 34_7

【初宵看婚】杨师道

洛城花烛动，戚里画新蛾。
隐扇羞应惯，含情愁已多。
轻啼湿红粉，微睇转横波。
更笑巫山曲，空传暮雨过。

卷 34_8

【侍宴赋得起坐弹鸣琴二首（一作杨希道诗）】杨师道

北林鹊夜飞，南轩月初进。
调弦发清徵，荡心祛褊吝。
变作离鸿声，还入思归引。
长叹未终极，秋风飘素鬓。
丝传园客意，曲奏楚妃情。
罕有知音者，空劳流水声。

卷 34_9

【咏琴（一作杨希道诗）】杨师道

久擅龙门质，孤竦峯阳名。
齐娥初发弄，赵女正调声。
嘉客勿遽反，繁弦曲未成。

卷 34_10

【咏笙（一作杨希道诗）】杨师道

短长插凤翼，洪细摹鸾音。
能令楚妃叹，复使荆王吟。
切切孤竹管，来应云和琴。

卷 34_11



【应诏咏巢乌】杨师道

桂树春晖满，巢乌刷羽仪。
朝飞丽城上，夜宿碧林陲。
背风藏密叶，向日逐疏枝。
仰德还能哺，依仁遂可窥。
惊鸣雕辇侧，王吉自相知。

卷 34_12

【奉和夏日晚景应诏】杨师道

辇路夹垂杨，离宫通建章。
日落横峰影，云归起夕凉。
雕轩动流吹，羽盖息回塘。
薤草生还绿，残花落尚香。
青岩类姑射，碧涧似汾阳。
幸属无为日，欢娱尚未央。

卷 34_13

【奉和圣制春日望海】杨师道

春山临渤海，征旅辍晨装。
回瞰卢龙塞，斜瞻肃慎乡。
洪波回地轴，孤屿映云光。
落日惊涛上，浮天骇浪长。
仙台隐螭驾，水府泛鼇梁。
碣石朝烟灭，之罘归雁翔。
北巡非汉后，东幸异秦皇。
褰旗羽林客，跋距少年常。
龙击驱辽水，鹏飞出带方。
将举青丘缴，安访白霓裳。



卷 34_14

【春朝闲步】杨师道

休沐乘闲豫，清晨步北林。
池塘藉芳草，兰芷袭幽衿。
雾中分晓日，花里弄春禽。
野径香恒满，山阶笋屡侵。
何须命轻盖，桃李自成阴。

卷 34_15

【还山宅】杨师道

暮春还旧岭，徙倚玩年华。
芳草无行径，空山正落花。
垂藤扫幽石，卧柳碍浮槎。
鸟散茅檐静，云披涧户斜。
依然此泉路，犹是昔烟霞。

卷 34_16

【咏马】杨师道

宝马权奇出未央，雕鞍照曜紫金装。
春草初生驰上苑，秋风欲动戏长杨。
鸣珂屡度章台侧，细蹠经向濯龙傍。
徒令汉将连年去，宛城今已献名王。

卷 34_17

【奉和咏弓】杨师道

霜重麟胶劲，风高月影圆。
乌飞随帝辇，雁落逐鸣弦。

卷 34_18

【咏砚】杨师道

圆池类璧水，轻翰染烟华。
将军欲定远，见弃不应赊。

卷 34_19

【奉和正日临朝应诏】杨师道

皇猷被寰宇，端扆属元辰。
九重丽天邑，千门临上春。

卷 34_20

【咏舞（一作杨希道诗）】杨师道

二八如回雪，三春类早花。
分行向烛转，一种逐风斜。

